

Pol ile malueng teltelnga aka i wat i a toko lemioongare nge ako o voth a Tesalonaika

1 Tesalonaika

Ritetong nge a 1 Tesalonaika

Pol i es a epee a Masedonia na i panongpol Tesalonaika angare nge Panongpolong Sivenga, na ile panongpolong aken i pavelpol toko lemioonga pelie a rem aken. Pol ia sagu rintet toko lemioongare aka o voth a rem a Tesalonaika, na i panes mun vothung vengvenga nge wop lemi aka i voth tomo nge or. (2:1-12) Aveto kerengaing aolonga i velpoltun toko lemioongare nge wop lemi aken, mako o ovulal a Pol ve aro i plosa ma i es, aro vene mo rinong aro i el i. (Pakeke 17:1-10) Mako Pol i es tel a Beria, lamako i es ol a Atens la. Ma i velpol a Atens, aveto rongan ilemi voth nge Tesalonaika angare, nge matheong aken o el i, (2:13-3:10) mako i pake a Timoti a or nge. (3:1-5) Panen tie lamo Pol i esu a Korin la, na Timoti i lo werer ma i ria Pol nge Tesalonaika angare ole asaguong na ole lemioong. (3:6) Mako Pol i wat malueng ake a or nge, mo aro i paengeng or, naro i patoral or nge vothung sivenga panesnga. (4:1-12; 5:12-22) Na Pol i patoral mun or nge aka Krais aro i lo werer me, na nge toko lemioongare ole los wereraing nge rinong, eneke Pol i voth tomo nge or palolo avele, ma olemi nine senu nge ur areken rongan. (1:9; 4:13-5:11) Pol ile patoraling nge nang le vusonga ini ur aolonga aka i voth nge ile malueng or aini aka i wat i a toko lemioongare nge aka o voth a rem a Tesalonaika. (O thopol mun 2 Tesalonaika 2:1-12)

Pol tomo nge ithangangaere olemi kerere nge Tesalonaika angare

(Vonge 1:1-3:13)

1 ¹Tho a Pol tomo nge a Sailas ome a Timoti.

Them wat malueng ake a thomu toko lemioongare nge aka a rem a Tesalonaika aka thomu ini Titemer a God na Toko Pomnga a Jisas Krais

ole.

Na tho nong ve aro God ile themosaling na ile lemi moring aro i voth tomo nge thomu.

Pol ilemi sivenga nge Tesalonaika angare ole lemioong.

2 Na evelelnga them ri sivengaing a God nge, nge thomu alavusnga, na lemimem rum thomu nge lemem nongongre. **3** Na nge lemem nongong areken, ako a Titemer a God nge, evelelnga lemimem rum thomu, nge lomu omaing ako lomu lemioong i pavelpol i, na nge lomu omaing engenga ako lomu asaguong i pavelpol i, na nge lomu mit engenging ako lomu men sialing nge ar Pomnga a Jisas Krais ile lo wererong me, kene i pavelpol mun i.

4 Na titeik areko God ia sagu thomu, lemimem mire ako i ategal thomu ve ini ile, **5** eneke nge wop lemi aka them panongpol Panongpolong Sivenga a thomu nge, i velpol ini riong polpolnga a thomu nge avele, aveto i velpol tomo nge pathepolong engengare aka Oni Riringa i pavelpol i. Na i pavurvur aka aro thomu o thepol nine aka, lemem lemioong i engeng rintet nge Panongpolong Sivenga aken. Na e mun e aka lomumu mire nge lemem vothung sivenga aka them pathengal i a thomu nge, nge aka them voth tomo nge thomu. **6** Na thomu o elo a God ile riong aken, make matheong pulua i velpoltun thomu, aveto Oni Riringa i pavelpol lemi sivengaing a lomu mimiong, na nge vothung aken i velpol a thomu nge ranga ve aka i velpol a them nge, na a Toko Pomnga mun nge. **7** Na lomu matheong potunnga tomo nge lemi sivengaing aken i velpol ranga ve ini paatealing sivenga, aka i sivenga aka aro toko lemioongare ake a epee a Masedonia na Akaia aro o panes i. **8** Na lemimem mire aka i venen aken, eneke Toko Pomnga ile riong i kimapot a thomu nge me, na i ranga ve ini kom le onngaing. Na i kima inga a epee ake a Masedonia na Akaia avele, aveto a pen elonga aka them es nge kene o nongpol mun nge ritetong aka lomumuo ol nge a God. Maken them pavurvur aro them ritet ol or nge ritetong aken avele, **9** eneke osivenga o rurum toko na sengre nge lomu vothung sivenga aka ranga ve o nongpoo them nge nang aka them velpol a thomu nge. Na o rurum mun nge aka thomu o lel kimomu nge avalare olotualnga, na o eksing, mako o elo a God a lomu mimiong, make o velpol ol ini a God nunganga aka i mimi, ile umongare. **10** Na o ri mun nge lomu vothung aka o men sial ol nge a God Itun ile lo wererong a Pen a Urvet me, ini a Jisas aka God i palos werera i nge rinong, na ini toko aka i pamimi it nge a God ile lemi klingong aka aro i velpol panen.

Pol i ri nge ile omaing aka i oma i a Tesalonaika nomenga.

2 **1** Na titeikre, lomumu mire lale aka ve, lemem umong aka them oma i a thomu nge, nge aka them voth tomo nge thomu, ini ur polpolnga avele,

aveto i pavelpol imonnga. ²Na lomumu mire mun ako nomenga, nge ako them es a thomu nge rongan, na rongan them voth a rem a Pilipai, ma them el matheong na sisisong aolonga, na o ri riong kerenga a them nge, aveto nge ako them es a thomu nge, ler God i opoal them, make them ngeip avele nge areko o engeng ve aro o volalal them, ma them panongpol thomu nge a God ile Panongpolong Sivenga. ³Na nge ako them leng thomu ve aro lomumuo nge a Jisas, them ngeip avele, eneke them sung riong nunganga a thomu nge, na them pamolomolo thomu avele, na lemem apaltet thomu avele. ⁴Aveto them ini toko areko God ilemi sivenga nge lemem mimiong, lamako i sungu omaing nge ile Panongpolong Sivenga panongpolnga a them nge. Na lemimem ve aro them oma omaing mo i palemi senu tokokoere, kene avele, aveto aro i palemi senu inga a God ako i avrum lemimem. ⁵Na lomumu mire lale ako ve, lemem olo thomu avele, na them selalo ako them engeng nge umtun elnga, kene avele. Na ini a God ako i thepol lemem vothung ma i ri ve i vengveng inga. ⁶Na lemimem ve aro them um mo thomu eve toko mun pelie aro o paesa iomem roro, kene avele.

⁷Na i nunganga ako them ini a Krais ile pakekere, make them pavurvur ako aro them sung matheong a thomu nge, nge thealngemem. Aveto nge ako them voth tomo nge thomu, them nak inga vothung ranga ve ini wain a nina ako i theal senu itutunre na i pasusu or. ⁸Na emem sagu rintet thomu, make them sis rintet ve aro them opoal thomu nge a God ile Panongpolong Sivenga ienga inga avele, aveto them sungpot mun lemem mimiong nge opoalngomu, eneke thomu o velpol ranga ve ini titeimem sivengare. ⁹Titeikre, nge wop lemi ako them voth tomo nge thomu, na them panongpol thomu nge a God ile Panongpolong Sivenga, na lemil mire ako lomumu rum werer nge lemem omaing engenga aken ako them oma i nge menimem, ako them um engeng nge nang na mlik moro aken aro them mothong tova them sungu matheong a thomu nge, nge thealngemem nge ur pelie.

¹⁰Na sivengomu o thepol na lomumu mire, na God mun i thepol na ilemi mire nge vothung ako them oma i a thomu areko lomumuo nge a Krais, ranga ve ako them oma inga vothung ako i riri a God itheki, na vothung ako i vengvenga a tokokoere nge, na vothung ako vothung kerenga e avele i voth a lemi. ¹¹Na lomumu mire mun ako vothung ako them oma i a thomu omole omole nge, i ranga ve ini vothung ako wain a vovo i oma i a itutunre nge. ¹²Ako ranga ve them sung riong aka aro i paengeng lomumu na i opoal thomu nge matheong potunnga. Na them tor mun lomu mo o panes inga mimiong aka aro i palemi senu inga a God, na ini a God aka i lengo thomu a ile menong e nepes mo o el mun ia malmaling a urvet aken.

Pol i ri sivengaing aka toko lemioongare o mit engeng nge matheong potunnga.

¹³Na opisleonga them ri sivengaing mun a God nge, nge thomu, eneke nge wop lemi aka thomu o elo a God ile riong aka them ripot i nge

womem, lomumu ve ini tokokoere ole avele, aveto thomu o elo i ranga ve ako ini a God ile riong nunganga. Na i nunganga, aken ini a God ile riong nunganga aka i um a thomu toko lemioongare a lomumu nge. ¹⁴Na titeikre, lemimem mire aka ur aken i nunganga, eneke ur areko i velpol a thomu nge, i ranga ve ini mun i aka i velpol a God ile lotuongare aka o voth a Judia aka o teo a Krais Jisas nge. Na i vene: Thomu o el mun matheong aka a lomungare omeni, ranga ve aka Judare o el mun matheong a olengare omeni. ¹⁵Na or ini tokokoe mun areko o pun rin Toko Pomnga a Jisas na God ile riong elnga nomengangare mun, na o wis meresu mun them. Na nge ole vothung areken o palemi kling a God, na o velpol ini toko alavusngare ole ngarang. ¹⁶Eneke o engeng ve aro o mit roal them ve, them mothong tova them panongpol areko or ini Judare avele, eneke oni plong ve aro God i el werer or nge lemem panongpolong aken. Na nge ole omaing areken, o paen tomoal ole vothung kerenga, makola i vual taktak, mako God ilemi esal ol or avele, mako i paomelal ol or nge ile lemi klingong aken.

Pol i sis rintet aka ve, i thepol mun ine Tesalonaika angare.

¹⁷Aveto a them nge, titeikre, Judare ole omaing aken, i ovulal them ve aro them voth tomo nge thomu avele nge wop lemi tel ake. Na them voth tomo nge thomu nge nimem peti avele, aveto nge lemimem them voth tomo ol nge thomu. Make them kath rintet sovengalo pelie aka aro them es werer a thomu nge wot, eneke lemimem i voth rintet nge thomu. ¹⁸Na aken i nunganga, eneke them sis ve aro them es a thomu nge wot, ma tho a Pol, tho ri nunganga, nang pulua tho tongporum aka aro tho es wot, aveto Satan i mit roal them. ¹⁹Na them sis ve aro them es werer a thomu nge wot, eneke them men sial nge nang aka aro thomu o mit engeng a Jisas itheki tova i lo werer nge me. Na thomu mun ini areko o palemi senu them nge lomu lemioong, na thomu mun ini areko aro them magon nge thomu, nge nang aka aro ar Pomnga a Jisas Krais i lo werer nge me, eneke lemem omaing monnga i velpol senu a thomu nge. Na toko pelie avele o mukal nge thomu nge aken. ²⁰I nunganga, thomu ini toko na seng areko them magon nge thomu, na thomu ini areko o palemi senu them.

Pol i pake werer a Timoti a Tesalonaika angare nge.

3 ¹Na i venen aken na lemimem kerere rintet nge thomu, na i pavurvur aro them men palolo tomo nge matheong aken avele. Make a lemimem i sivenga aka aro them e a Sailas sivengemem aro them voth werer a Atens. ²Na them pake werer a Timoti aka ini titeir lemioonga e aka i um tomo nge them nge a God ile umong aka nge a Krais ile Panongpolong Sivenga panongpolnga nge pen elonga. Make them pake i mo i paengeng thomu na i opoal thomu, nge lomu lemioong. ³Aro vene mo matheong areke aro o pavothal thomu. Ave

lomumu mire senu lale ako ve, God i ateal it lale ve aro te el matheong areken.
⁴Na lomumu mire ako ur aken i nunganga, eneke nge ako rongan them voth tomo nge thomu, ma them ria thomu papulua a mukaling ve, matheong pulua aro i velpoltun it. Na lomumu mire ol ponange ako ve, ur ako them ri nge, kene i velpol lale. ⁵Na nge lomu matheong areken inga, tho pavurvur aro tho palolotun ol ur e avele. Make tho pakepot werer mun a Timoti a thomu nge wot, mo i avrum vet nge lomu lemioong. Eneke lemik ako ve, ava Satan i sangpolo sovengalo pelie ako va i tongporum thomu nge, aken varo lemem umong areken aro i velpol ini ur polpolnga inga.

Timoti i ritet nge Tesalonaika angare ole mit engenging.

⁶Aveto avele! Na Timoti aka i losa a thomu nge, ponange re ake ma i velpol werer a them nge, ma i pavelpol ritetong sivenga nge lomu lemioong na nge lomu asaguong. Na i ria them mun ve, opisleonga lomu lemi rumong nge them i sivenga inga, na evelelnga thomu o sis ve aro o thepol werer mun them, ranga ve mun aka them sis ve aro them thepol werer mun thomu. ⁷Na titeikre, them nongpol aka ve, lomu lemioong rongan i voth engeng. Na aken i paengeng lemimem nge matheong na sisong aka them el i. ⁸Na them nongpol aka lomu lemioong i mit engeng nge a Toko Pomnga, make ponange lemem mimiong i sivenga rintet ol. ⁹I nunganga, na them pesrou avele nge lemem riseaing a God nge, nge thomu, eneke lemimem i sivenga rintet nge thomu aka a ler God itheki. ¹⁰Na nge nang na mluk them nong engeng ve aro them thepol werer mun thekumu mo them opoal mun lomu lemioong nge ur aka rongan o oror nge.

Pol ile nongong a God nge.

¹¹Na them nong ve aro ler God isivenga aka ini Titemer na ar Pomnga a Jisas aro o monsi lemem sovengalo aka aro them es werer a thomu nge wot. ¹²Naro Toko Pomnga aro i paaolonga lomu asagupeling tomo mun nge lomu asaguong nge toko alavusnga mo i aolonga rintet ranga ve ini lemem asaguong a thomu nge. ¹³Na nge sovengalo aka God aro i paengeng lomumu, mo aka nge nang aka aro thomu o mit a Titemer a God itheki nge nang aka ar Pomnga a Jisas i es werer nge me tomo nge ile toko riringare, aro i thepol thomu aka ini toko riringa aka ur kerenga e avele i voth a thomu nge. I nunganga.

Tesalonaika angare aro osa womo vothung sivenga mo i engeng ol a or nge

(Vonge 4:1–5:28)

Mimiong aka God ilemi sivenga nge.

4 ¹Na titeikre, lek riong patopalalnga i vene: Thomu o el pamirealing lale a them nge, nge mimiong aka God ilemi sivenga nge. Na i

nunganga ako rongan thomu o mimi venen aken. Aveto ponange them nin na them tor lomu nge engenging ako Toko Pomnga a Jisas i sungu i a them nge, ve aro thomu o rong esa mun lomu vothung ako i venen aken mo i esa esa. ²Eneke lomumu mire nge torong areko them tor lomu nge, aka them el i a Toko Pomnga a Jisas nge.

³Na vothung aka God i sis ve aro thomu o oma i kene i vene: Aro thomu o sungpot lomu mimiong alavusnga a God nge, mo lomu vothung i vengveng inga a itheki, ranga ve aka aro thomu o voth mela nge vothung aka nge ngo tomoing nge areko or ini ewomuere avele. ⁴Na i sis mun ve aro thomu toko omole omole aro lomumu mire senu nge sovengalo aka aro o el ewomu sengengaere nge, aka aro i vengveng a God itheki, na a tokokoere otheki mun. ⁵Na o mothong tova o oma ranga ve ini areko olemi mire nge a God avele, aka otheki roro nge sangre na o panes inga vothung kerenga engenga aka oopo i vurpoltun i. ⁶Na nge vothung aken God i sis ve aro thomu o mothong tova o pakol titeumu lemioonga e ikei, eve o oma vothung kerenga pelie a i nge. Toko Pomnga aro i paomelal tokokoere nge ole vothung aka i venen aken, ranga ve aka them ri na them tor lomu nge lale. ⁷Naro i paomelal or, eneke God i lengpot it ve aro te oma vothung akopnga, kene avele, ave i lengpot it ve aro te oma inga vothung aka i riri a itheki. ⁸Maken aro ve toko e i lel ikime nge pamirealing ake, aken i lel ikime nge tokokoere ole pamirealing avele, aveto aka ini a God ile pamirealing aka i lel ikime nge. Na ini a God aka i sungu Ioni Riringa a thomu nge.

Aro te um engeng mo aro vothung sivenga aro i velpol engeng a it nge.

⁹Na nge titeumu na lulumu lemioongare oasagunga, i pavurvur aro tho wat ol riong pelie a thomu nge avele, eneke thomu kene, God i pamireal thomu lale ve aro omu sagu pel. ¹⁰Na i nunganga aka omu sagu titeir na lulur lemioonga alavusnga aka o vota a epee a Masedonia. Aveto titeikre, them ri engeng thomu ve aro o rong esa mun vothung aka i venen aken mo i esa esa.

¹¹Na them ri engeng mun thomu ve aro o betet inga nge lomu menong le sivengainga naktetnga, na o mothong tova o situn pel mo o pavothal thongongomuere, aveto aro o um engeng inga nge sivengomu lomu mimiong thealnga, ranga ve aka them ri tel i a thomu nge lale. ¹²Aken aro i oma thomu mo toko relnga e avele aro i theal thomu nge ur elonga nge lomu mimiong aken. Naro o mimi venen aken mo lomu mimiong aken aro i oma areko or ini toko lemioongare avele, mo o ri riong kerenga e avele nge lomu mimiong aken.

Pol i patoral nge a Toko Pomnga ile lo wererong me.

¹³Na titeikre, them sis ve aro lomumu mire senu nge areko o rin lale, mo o mothong tova lomumu kerere nge or, ranga ve ini areko or ini toko

lemioongare avele, ako o men sial nge ole mimiong panen anga avele.

¹⁴Naro lomumu kerere nge or avele, eneke lemiro ako ve, Jisas i rin lale ma i los werera mun, aken lemiro mun ako ve, areko olemio nge a Jisas na o rin lale, God aro i wola or tomo nge a Jisas, tova Jisas i lo werer nge me. ¹⁵Na i ranga ve aka Toko Pomnga isivenga i ri nge lale, na them ri mun i a thomu nge ve, it areko rongan te mimi ake ru a ulue, i mulal nge nang aka Toko Pomnga aro i lo werer nge me, aro te mukal la tel avele, nge toko lemioonga areko o rin lale. ¹⁶Eneke God aro i presa viringa, naro enselre ole mukalinga aro i leng lengpot, naro i thupot a God ia kuth, naro Toko Pomnga isivenga aro i esu a Pen a Urvet me, na areko olemio nge a Krais na o rin lale, aro o los werera tel nge rinong. ¹⁷Lamo it areko rongan te mimi ake ru a ulue, God aro i el tomoa it nge or a malang po la, mo te thepolo a Toko Pomnga nge. Na nge sovengalo aken, aro te voth tomo nge a Toko Pomnga evelelnga aka aro ile vusonga avele. ¹⁸Na riong aken i nunganga, maken aro thomu o paengeng pel lomumu nge riong aken.

Aro te monsi na te thealal nge a Toko Pomnga ile lo wererong me.

5 ¹Na titeikre, i pavurvur aro tho wat ol riong pelie a thomu nge, aka nge nang kathnga aka aro Toko Pomnga i lo werer nge me, kene avele, ²eneke lomumu mire senu lale aka ve, Toko Pomnga ile nang aken aro i velpoltun tokokoere, ranga ve ini toko kemonga aka i pakuktun kemong a or nge pemlik. ³Na nge aka toko na sengre o ri ve, “Lemi moring na men senuong i velpol ol a ulue lale.” Na nge wop lemi aken, kerengaing aro i pakuktun or ranga ve ini popong a sisisong aka i velpoltun seng aka iopo, naro o pavurvur aro o lo nge avele.

⁴Aveto thomu titeikre, thomu o voth ol a mideng avele ol, maken aro nang aken i pavurvur aka aro i pakuktunu thomu ranga ve ini toko kemonga, kene avele. ⁵Eneke thomu ini pen lalanga tomo nge nang itutunre, eneke lomumuo nge a Toko Pomnga. Na it toko lemioongare it ini mideng esngare avele ol, na i ranga ve aka te voth nge mideng avele. ⁶Na i venen aken mo te mothong tova it ranga ve ini areko o nokolkol, aveto i sivenga aka aro te thealal, naro ler lemi rumong i nine ol. ⁷Eneke areko o nokolkol, o nokolkol inga pemlik na areko o thin loptet thei engenga, o thin inga pemlik. ⁸Aveto it kene, it ini a God ile pen lalanga ilengare, mako aro te engeng mo ler lemi rumong aro i nine inga. Ako ranga ve aro te teuna ler lemioong na vothung aka nge asaguong mo o paseral ler, ranga ve ini toko ile teunong paseralnga aka i paseral ipakei nge punong. Naro lemiro inga nge a Jisas ile omaing aka aro i pamimi it nge, aken aro i paseral mun it ranga ve ini pounger paseralnga. ⁹Naro te paseral it venen aken, eneke God i ateal it ve aro te el ile lemi klingong a paomelaling avele, aveto i ateal it ve aro i pamimi it aka nge ar Pomnga

a Jisas Krais ile rinong. ¹⁰Na i rin nge opoalnger, mo ako aro nge ile lo wererong me, aro ve te mimi eve te rin lale, aro te voth tomo ol nge i. ¹¹Maken aro thomu o kis inga vothung aka aro o paengeng pel lomumu nge, naro o opoal pel sivengomu mo lomu lemioong i mit engeng inga, ranga ve aka ponange thomu o oma i.

God aro i opoal toko lemioongare nge vothung sivenga omanga.

¹²Na titeikre, them nong thomu ve aro o papomnga areko o voth tomo nge thomu aka o um engeng nge a God ile omaing a thomu nge, eneke or ini lomu mukalingare aka nge Toko Pomnga ile atealing aka o pamireal thomu nge vothung vengvenga omanga. ¹³Naro thomu o papomnga rintet or na oa sagu or, eneke ole omaing aken i opoal thomu. Naro thomu o men senu inga tomo nge pel. ¹⁴Na titeikre, them nong engeng mun thomu ve aro o oma vene: Aro o pator engeng areko otheki namal, naro o paengeng areko o ngeip polpol, naro o opoesal areko ole lemioong i motu rongan, naro o oma vothung mosnga a toko na seng alavusnga nge. ¹⁵Na aro ve toko e, i oma vothung kerenga a omu e nge, aro thomu o palemi rumal i ve, i mothong tova i olal i a i nge, aveto evelenga aro thomu o um engeng ve aro o oma vothung sivenga inga nge titeumu lemioongare, na nge areko or ini toko lemioongare avele mun.

¹⁶Na evelenga aro thomu o risea inga. ¹⁷Na evelenga aro thomu o nong inga a God nge. ¹⁸Na ur kathnga aka i velpoltun thomu, aka i sivenga eve i kerenga, aro thomu o ri sivengaing inga a God nge, eneke God i sis ve aro thomu areko o teo a Krais Jisas nge, aro o oma vothung areken.

¹⁹Na aro ve Oni Riringa i pavurpola ur pelie a lomumu, o mothong tova o mit roal i nge. ²⁰Na aro ve Oni Riringa i pavurpola riong a omu e nge, na i panongpol i a thomu nge, o mothong tova lomumu ve, ini riong polpolnga. ²¹Aveto aro o nongpol rum vet riong alavusnga mo lomumu mire senu nge ve, i es a God nge me eve avele, na aro ve i sivenga, aro o panes i. ²²Aveto aro o mothong vothung kerenga elonga.

Pol ile riong patopalalnga.

²³Na tho nong a God nge aka i sung lemi moring a it nge, ve aro isivenga aro i pariri thomu mo thomu o riri selele. Na tho nong mun i ve aro i oma thomu mo vothung kerenga e avele aro i voth a lomu lemi rumong, na numu peti, na onumu mun, i pavurvur nge nang aka aro ar Pomnga a Jisas Krais i lo werer nge me. ²⁴Na God aka i leng thomu mo thomu ini ile, isivenga kene aro i oma venen aken nge thomu, eneke i panes inga ile riong elonga.

²⁵Na titeikre, aro thomu o nong mun nge a God mo aro i opoal mun them. ²⁶Naro thomu o titpororoling a toko lemioonga alavusngare nge, ranga ve aka omu sagu pel.

²⁷Na tho a Pol, tho tor engeng lomu ve aro o kin lomu riong tomo nge a Toko Pomnga ve aro o tital malueng ake a toko lemioonga alavusngare nge.

²⁸Na tho nong ve aro ar Pomnga a Jisas Krais ile themosaling aro i voth tomo nge thomu.

Na i re aken. I vus.